



Vniuersa Theologia Scholastica, Speculatiua, Practica

Ad methodum S. Thomæ, quatuor Tomis comprehensa

Tanner, Adam

Ingolstadii, 1626

II. Sitne in mente diuina secundu[m] ratione[m] nostra[m] æliquis ordo prioritatis inter prædestinatione[m] vel præuisionem meritorum seu mediorum in particulari, & electione ad gloria[m], aliosue ...

[urn:nbn:de:hbz:466:1-72856](#)

creto daretur, quo proinde ultimè ntitur conditionata illa futuritio.

43 Dixi vero in assertione, nihil obstat, quò minus gratia efficax, qua efficax est, ex hoc capite prædestinari possit ante cooperationem nostram: nam vtrum ordine intentionis absolute definatur ante cooperationem nostram, ad quam veluti finem ordinatur, dicetur dub. 6. Quod si quis non neget, gratiam efficacem, seu congruam, ante futuritionem & prævisionem absolutam cooperationis nostræ, habere vim infallibilem, sive ex se & natura sua, sive ut subest scientia Dei medie, præducendi effectum, solum verò neget, eam hinc propriè efficacem dici, quasi efficax gratia idem sit quod efficiens, is quidem solù de nomine contendet; sed in hac ipsa tamen re à proprietate vorum recedet. Quiarevera secundum vim nominis, & communem ipsum loquendi, non est idem efficax quod efficiens, sed illud vim agendi in actu primo, hoc actualem efficientiam in actu secundo significat. Dicimus enim propriissime, hoc medicamentum, seu hoc vinum aut acetum esse efficax, etiamsi ad ipsum necdum sit applicatum. Ita ergo etiam gratia efficax dicenda est propriè & formaliter, non ab actuali efficientia, sed ab illa vi infallibili, quam habet ut subest scientia Dei medie. De qua re pluribus in materia de gratia agendum erit.

DVBIVM II.

Sitne in mente diuina secundum rationem nostram ordo aliquis prioritatis, inter prædestinationem, vel prævisionem meritorum, seu mediorum in particuli; & prædestinationem ipsius gloria, aliosue actus, quibus Deus saluandis vult gloriam.

S. Thomas t. p. q. 23. a. 5. & 7.

Tria quidem sunt, quæ inter se, hac & sequenti dubitatione, præcipue comparantur; nimirum. 1. Electio seu prædestination ad gloriam. 2. Prædestination meritorum. 3. præscientia meritorum, quæ prædestinationem meritorum consequitur: Sed horum actuū occasione, simul etiam de quibusdam alijs actibus diuinæ voluntatis, quibus Deus saluandis vult gloriam, agendum est. Neque verò inter hos actus certus ordo rationis prius constitui potest, quam constet, an sit inter eos aliquis ordo rationis. Dum autem de meritis sermo est, quæ in adulto prædestinato ad gloriam comparantur, tanquam media ad finem, subintelliguntur simul hic etiam alia media: cum sit re ipsa ad præfens institutum par ratio omnium mediorum, respectu cuiuscunq; demum prædestinati, si comparentur ad gloriam eiusdem; adeo ut quæstio procedat tam de paruulis, quam adul-

tis, an videlicet in Deo, secundum rationem nostram, sit aliquis ordo prioritatis inter electionem ad gloriam, & prædestinationem vel præscientia mediorum, puta baptisimi, gratiae, vel meritorum &c. quibus vnuquisque prædestinatus reipsa saluat.

Et est sententia quorundam Theologorum, qui docent, nullum esse ordinē inter prædestinationem, vel etiam præscientiam meritorum, seu mediorum, & electionem ad gloriam; sed Deum unico simplicissimo decreto, absque vlo instantium aut signorum, etiam secundum rationem nostram, ordine, seu absque omni prioritate rationis, consummare prædestinationem; quo nempe alicui velit & destinet seriem aliquam mediorum, quibus per scientiam conditionatam cognovet, eum peruenientum ad gloriam. Ita absq; authoris nomine referi Suarez hiclib. 1. de prædest. cap. 8. n. 3. expresse vero ita docuit Gabriel in 3. dist. 2. q. vn. a. 3. dub. 3. vbi contra Scotum ait, quod illa prioritas & signa non sunt ponenda in diuinis, sicut satia deducit Ockam in 2. dist. 9. q. 3. Vnde in nullo signo prædestinavit quemcunq; ad beatitudinem, qui in eodem prædestinavit omnes beatificandos, & præsulit omnes damnatos, & præuidit omnia futura (in quibus utique sunt etiam adulti merita) Nec est talis ordo in diuinis, sed ab eterno prædestinavit quos elegit; præsulit etiam quos reprobat, simulq; præuidit merita & demerita, pñas & futura pñmia. Ita Gabriel. Idem docuit Ockam, ab eodem citatus.

Et refert pro eadem sententia Eckius in Chrysopasso cent. 2. n. 11. ceteros Nominales, quos vocat Recentiores & Neoterici; cum pro opposito sententia retulisset Scotum, his verbis: *Huic dicendi modo (Scoti) Neoterici repudium dant, ut valens ille Gregorius Ariminensis, Petrus de Candia, Cardinalis Cameracensis, Guilielmus de Ockam, Dominus Præpositus, Iohannes Maior, amanu ingenij Doctor. Verum rationes eorum non sunt nervosa, & facile excutuntur. Non enim quifiam imaginari debet, Doctorem subilem tam pauperem suffice ingenij (non dico tam hebetem) ut existimaret calens ordinem suffise in intelligentia diuina cuiusdam suceptum; ita quod non omnia simul ab eterno intellexerit; qui hoc veller, bone Deus, non dico afferere, sed ne credere quidem? Voluit tamen Doctor subtilis, non obstante eo, quod DEUS omnia simul intelligat, adhuc ex natura rei (seu potius secundum rationem) esse tales ordinem intelligibilium & intelligendi, qui simultatem temporis non excludit. Et hoc bona Metaphysica facile intelligit, quando rerum sensibilium phantasmaribus abstractis, ipsas purissimas quidditatim rationes intuetur, &c.* Et quod immores (qui ita obstreperunt) idem senserint in re, & sentire cogantur, ex his facile accipi potest. Ita Eckius; qui mox pluribus probat, nec ipso quidem istos Nominales reipsa ordinem quemdam rationis inter eiusmodi actus diuinæ mentis negasse.

Eandem sententiam, quam ex Suario retulimus, expresse sequitur Molina hic q. 23. a. 5. disp. 1. memb. 7- vbi ait: *Denique cum Deus unico simplicissimo actu sua voluntati, præuaq; plenissima delibera- tione, seu cognitione, circa res omnes, voluerit ex eternitate quicquid voluit, sane exterminanda omnia videntur instantia scoti, & aliorum, in quibus in statuenda incarnatione, prædestinando Christo, cum ceteris beatis, aut re-*

probab-

probando ceteris hominibus, D E U S unum voluerit ante aliud, aut per scientiam liberam præniderit unum ante aliud: que certe instantia adeo obscuram reddunt questionem hanc, ut vix, ac ne vix quidem intelligi queat. &c. Et infra ibidem ait: *Ad fundatum illud, cui scotus & alij in eiusmodi instantium designatione innituntur, dicendum est, se velint, cum qui ordinatur, hoc est, ordine quodam unum post aliud, vult finem & media, primum debere velle finem, quam media, verum quidem esse: Deum tamen non ita se habere, præsentum in re, de qua disputationem, sed simul velle finem ac media. si vero velle ordinatur idem sit, ac non præposteri, siue indecenter, respondendum est, nihil indecens & præposteriorum in eo cerni, quod Deus, qui uno actu intellectus omnia comprehendit, unicoque actu voluntatis vult media omnia & fines, velit simul medium & finem, atque adeo per scientiam libaram non præcognoscat unum eorum ante aliud.*

Et ibidem membr. 8. declarat, se non vniuersim quidem omnem prioritatem rationis inter actus diuinæ voluntatis reiçere, sed in tribus solum casibus seu eventibus. Primus, quando ordines aliqui inter se ita sunt complicati, ut quemnam in uno determinatè sint futura, mutuo pendent ex ijs, qua in alio, aut alijs futura sunt. Secundus, quando fines aliqui voluti sunt; unus dependenter ab alio, aut non sine alio. Tertius, atque ad præsens institutum pertinens est, quando finis neque volitus, neque proinde cognitus est absolute futurus, nisi dependenter à medijs. Quomodo cum Deus non vult adultis beatitudinem, nisi tanquam præmium, non vult etiam eiis beatitudinis consecutionem, nisi per media. &c. Idem repetit Molina infra ead. disputat. 1. memb. 13.

Præter hos est peculiaris quedam sententia Gregorij de Valentia, hic quæstion. 23. punct. 4. §. 4. vers. secundo obseruandum. Vbi licet admittat, esse aliquem ordinem prioritatis inter prædestinationem meritorum & gloria, si viraque hæc secundum se spectentur, nec verò etiam in prædestinato ylla detur causa meritiorum, vel ratio, seu conditio totius prædestinationis, aut omnium effectuum ipsius, ait tamen, nec adulti prædestinationem quoad yllum effectum, etiam loquendo de prima gratia congrua, fuisse omni ratione priorem, ipsa præscientia absoluta cooperationis perseverantis; sed potius hanc fuisse quedam ratione simul, cum decreto cuiuslibet effectus prædestinationis, qua talis: *hoc est, inquit, ut habeat certam habitudinem ad salutem eternam.* Fundamentum est; quia quisque effectus prædestinationis qua talis, habet infallibilem respectum ad salutem eternam, ipsius prædestinati, vt colligitur ex definitione prædestinationis, ex Augustino adferri solita: atqui vero in adultis non habet sine respectu ad cooperationem & perseverantium perdestinati, velut absolutè futuram. Ergo &c.

His tamen non obstantibus, opposita sententia, esse nimirum secundum rationem nostram aliquem prioritatis ordinem inter electionem ad gloriam, & prædestinationem meritorum seu mediorum, multoque magis præscientia

tiam eorundem, communis & vera est Docto- rum sententia, vt inferius demonstrabimus.

Pro cuius explicatione, præter ea, quæ de duplice ordine intentionis & executionis, atque etiam generatim de ordine prioritatis, inter actus diuinæ voluntatis, docuimus supra disput. 2. quæst. 10. dub. 5. Notandum est, varios actus diuinæ voluntatis efficacis, de qua sola in præsenti loquimur, distingui posse, quos Deus circa electorum beatitudinem, veluti ipsorum finem, & media ad eundem conduceantia habet, aut habere potuit.

Primò enim, vt in humanis actibus, intentione directè versatur circa finem, non nisi oblique verò & indirectè circa media; quod est velle finem per media; è contrario verò electio directè fertur in media, oblique autem & indirectè fertur in finem, quod est velle media certa & determinata propter finem; iuxta Sanctum Thomam in 1. 2. quæst. 12. articulo 4. ad 3. cuius verba inferius referemus: ita etiam D E U S efficaciter vult electis conferre gloriam, per merita seu media; qui actus quasi instantie intentionis se habet; & simul media seu merita propter gloriam; qui electionis actus assimilatur.

Neque dubium est, vtrumque eiusmodi actum verè ac propriè D E O conuenire; cum neuter ullam inuoluat imperfectionem; & re ipsa à Deo electis gloria conferatur & obtingat per merita, seu media, & media propter finem. Sicut enim medicus ægro vult sanitatem per media, per modum quasi intentionis; & rursum alio actu voluntatis certa quædam media eidem vult & eligit propter sanitatem eidem re ipsa procurandam, per modum electionis, ita etiam ijdem actus in D E O hominem ad beatitudinem perducente, necessario admittendi sunt.

Deinde verò loquendo vniuersim de voluntate diuina, que directè versatur circa gloriam, oblique verò solum & indirectè circa merita, seu media, varij adhuc diuinæ voluntatis actus distinguiri possunt; quorum alij propriè ad ordinem intentionis, alij ad ordinem executionis spectant, vt inferius declarabitur. Primus est generatim, & quasi abstracte ita aliquibus beatitudinem velle, vt nihil adhuc eo quidem actu secundum rationem nostram de medijs definiatur; nec adeo etiam omnino eo rationis instanti decernatur, an proprijs meritis, an solidis C H R I S T I meritis, per applicationem baptismi, &c. fint saluandi. Secundus est actus voluntatis, quo D E U S homini vult gloriam definitè etiam per propria merita. Tertius est actus voluntatis, quo Deus vult homini gloriam propter præuisa merita, seu, quod idem est, ex præuisis meritis, aut post præuisis meritis: vbi sermo est de præuisione seu præscientia meritorum non conditionata seu media, sed de præscientia absoluta que spectat etiam actus ille, quo D E U S vult homini conferre gloriam non solum post præuisa merita, sed etiam post exhibita iam merita: qui actus in D E O non nisi

nisi denominatione extrinseca à priori differre videatur.

9 Et quamvis de primo illo actu quasi abstracto dubium esse possit, an in Deo constitundus sit, ut inferius dicetur, eò quod quandam imperfectionem nonnullis videatur inuoluer; nullum tamen est dubium, nee esse potest, quin tres posteriores actus propriè ac formaliter in Deo sint constituendi, & quidem inter se ratione nostra planè distincti, atque etiam subordinati &c. Secundum enim actum ab æternitate habet Deus, etiam antecedenter ad futuritionem, aut præscientiam absolutam meritorum; quandoquidem est ratio & causa futuritionis meritorum: neque merita salutis vñquam futura essent, nisi Deus per merita etiam in particulari præordinasset hominem saluare: nihil enim facit Deus in tempore, quod ab æterno non prædefinierit; cum igitur Deus in tempore hominem per merita saluat, utique etiam voluit & decrevit ab æterno hominem per merita saluare.

10 Tertius actus Deo etiam denegari minimè potest; cum certissimum sit, Deum ob præuisa, seu post præuisa merita homini adulto conferre gloriam: Ergo etiam ab æterno voluit homini adulto post præuisa merita conferre gloriam. Differt autem ratione nostra hic actus à præcedenti; quia hæc voluntas ratione nostra supponit præuisiōnem, adeoque etiam futuritionem absolutam meritorum, eo ipso quod Deus post merita præuisa, adeoque post præuisiōnem meritorum homini vult gloriam; ersi per se non supponat actualem existentiam seu quasi præteritionem actualem meritorum; sed solum in quantum ille actus postea nouam sortitur denominationem à præteritione meritorum; seu quatenus haec suppositione facta, est actus conferendi gloriam ob merita re ipsa exhibita. Qui actus itidem Deo certissimè ac indubitate conuenit, cum ex fide constet, Deum in extremo iudicio singulis, ob vitam bene aut malèactam, sua præmia, vel supplicia sua voluntate designaturum: Ergo rursum cum omnia, quæ Deus in tempore facit, ab æterno velit facere, necesse est, Deum ab æterno habuisse voluntatem, qua voluerit homini conferre gloriam, ob exhibita, seu quod idem est, post exhibita iam merita; non ita quidem, vt voluntas illa conferendi gloriam, primum post exhibita iam merita à Deo conciperetur, sed ut in Deo esset voluntas æterna gloriam conferendi, post exhibita merita. His positis, sententiam veram & communem Theologorum de hac re sequentibus assertionibus exponimus; comparando voluntatem efficacem conferendi gloriam primum cum prædestinatione seu voluntate meritorum siue mediiorum in particulari; deinde cum præscientia eorundem, cum hæc duo inter se sint diuersissima, ut patebit.

11 Assertio I. Voluntas illa, qua Deus electis vult gloriam per merita, & merita seu media specialiter designata, ppter gloriam, licet re ipsa sit vna simplicissima voluntas, secundum rationem tamen nostram sunt actus distincti, habentes inter se quendam ordinem prioritatis vel posterioritatis: quod

proinde pariter etiam de electione seu prædestinatione ad gloriam & prædestinationis meritorum seu mediorum dicendum. Hæc est vetus & communis sententia Sancti Thomæ & Scholasticorum (exceptis Nominalibus, Neotericis ab Eckio appellatis, vt superius dictum) qui communiter omnes docuerunt, hominem prædestinari siue eligi ad gloriam, aut post præuisa merita, aut ante præuisa merita; seu quod idem est, ex præuisis meritis, vel non ex præuisis meritis: quos sequenti dubio longa serie referemus, & videre est etiam apud Vasquez disput. 89. cap. 1. & 2. & Suarez lib. 1. de prædest. cap. 8. Bellarmine lib. 2. de grat. & lib. arbit. c. 15. & ex parte etiam, apud Gregorium de Valentia hic q. 23. pun. 4. §. 1. & ipsummet Molinam cit. q. 23. a. 5. disp. 1. memb. 7. Nec dissimulat etiam ipse ibidem memb. 8. 13. quantas eius sententia, cum hac in re noua videretur, passa fuerit difficultates, & contradicitionib[us] obiectiones. Speciatim autem hic pertinent S. Thomas hic quæstio. 23. artie. 3. & omnes illi, qui docent, ordinem quendam, secundum rationem nostram esse inter Dilectionem, Electionem, & Prædestinationem, quos retulimus supra quæst. 2. dub. 3. Eadem est Sancti Augustini & Patrum sententia, vt dicimus eodem dub. sequent. Nec verò ex antiquis Scholasticis vñllum pro se citat Molina, nec vñllus etiam pro ea sententia ante Neotericos illos verè citari poterit; vt planè falsò veteribus Patribus & Theologis ea sententia à nonnullis tribuatur. Vide Speciationem Heruæum, Scotum, Durandum, sequenti dubio referendos.

12 Probatur assertio primo. Si enim actus ille diuinæ voluntatis, quo Deus hominibus efficaciter vult gloriam per media, & media propter gloriam, quamvis re ipsa vñus ac simplicissimus, intrinsecè tamen aquila et pluribus actibus creatis, inter se, iuxta consuetum operandi modum, realiter distinctis, verumque & realiter ordinem causalitatis & prioritatis habentibus, tunc necesse est etiam, secundum rationem nostram, & pluralitatem quendam, & ordinem prioritatis cerni in prædictis actibus diuinæ voluntatis & prædestinationis, prout efficaciter modo supra dicto terminatur ad eiusmodi obiecta; puta ad gloriam & certa media hominum saluandorum: sed verum est antecedens.

Maior pater. Quia pluralitas & ordo in diuinis actibus aliter non potest constitui, nisi per comparationem ad actus nostros, vt generatim dictum disputatio. 2. quæstio. 10. dubio 5. Nisi ergo omnem ordinem rationis, & pluralitatem actuum diuinorum, etiamsi actus voluntatis non inter se, sed cum actibus etiam intellectus comparemus, è medio tollere velimus; quod tamen Molina loco citat, à se planè alienum profitetur; non possumus id fundamentum negare.

13 Minor, de qua solum controversia est, probatur. Quia actus ille diuinæ voluntatis, quo electis vult gloriam per merita, & quo vult certa media, seu merita propter gloriam, aquila valeat

ualet apud nos intentioni finis, & electioni mediorum, vt omnes fatentur; quandoquidem gloria est finis, non quidem ipsius D e i, sed electorum, ab ipso etiam D e o per priorem illum actum efficaciter volitus & intentus; merita autem aliaque quæ D e v s adhibet & præordinat, ad gloriam electis efficaciter procurandam, habent se veluti media ad comparandam gloriam, quæ proinde etiam D e v s electis vult & præordinat propter gloriam: atqui vero intentioni finis & electio mediorum, saltem moraliter, & iuxta consuetum modum operandi humanum, apud nos sunt duo actus inter se realiter distincti, verumque & realem ordinem causalitatis & prioritatis habentes: Ergo actus ille diuinæ voluntatis, licet re ipsa vnu & simplicissimus, quo electis vult gloriam per merita, quoque rursus eisdem vult certa media seu merita propter gloriam, necessariò æquivalet pluribus actibus creatis inter se, necessariò distinctis, verumque & realem ordinem causalitatis & prioritatis habentibus. Major huius syllogismi est extra controvèrsiam; & satis pater ex ipsis terminis.

14 Minor probatur, non solum quia Intentio & Electio differunt ex parte obiecti Quod, directe & expresse voliti: illius enim obiectum Quod, expresse & directe volitum est finis, seu bonum propter se expetibile; huius autem obiectum Quod, directe & expresse volitum, sunt media, quæ non nisi propter finem expertuntur: sed etiam quia Intentio, esto appetat finem per media, abstrahit tamen à medijs in particulari; & sua natura communiter etiam tempore antecedit certorum mediorum designationem & electionem; vt mox ex Sancto Thoma, & communi Doctorum uberiori declarabitur: Sunt ergo duo isti actus, saltem moraliter loquendo, inter se realiter distincti; & quia Electio causatur ab Intentione, eamque supponit, necesse est, inter eos ordinem esse prioris & posterioris; vt aperte etiam sentiunt, & ex communi docent Hierucus, Scotus, Durandus, Maior, referendi dub. 3.

15 Eademque est non solum expressa sententia Ariminensis in 1. distinct. 1. question. prima, articulo secundo, & Marsili in 1. questione 4. articulo primo, dub. 2. quos ex instituto tueretur Vasquez 1. 2. disputat. 3. capit. 2. qui vniuersim docent, Intentionem & Electionem esse actus inter se realiter distinctos; sed est etiam planè doctrina Sancti Thoma in 1. 2. question. 8. articulo tertio, & question. 12. articulo 4. & quæst. 13. articulo tertio; nec dissentient Thomistæ & Theologi cæteri, vt explicauit Vasquez citat. capit. 2. & 3. saltem loquendo de communione & consueto modo operandi humano, vt bene etiam notauit Gregorius de Valentia tom. 2. disputat. 2. quæst. 3. punct. 3. vbi ex Caietano addit, Sanctum Thomam, cum citat. question. 8. articulo 3. ait, eundem esse actum quo volumus finem, vt rationem volendi media, & quo volumus media, non loqui de actu quo volumus explicite & formaliter finem, sed quo vo-

lumus finem virtualiter. Certe ex Sancti Thomæ sententia, Intentionem & Electionem inter nos moraliter & ordinariè esse actus realiter distinctos, facilè potest demonstrari.

Primo enim Sanctus Thomas in 1. 2. locis citatis de Intentione & Electione agit, tanquam de diuersis actibus voluntatis. Postquam enim quæstion. 11. & 12. ex instituto egisset de fruitione & intentione, tanquam de actibus voluntatis, qui circa finem versantur, mox initio quæstionis 13. progressum faciens ad electionem, aliosque actus, qui circa media versantur, ita præfatur: *Consequenter (secundum ordinem quendam posterioritatis accommodatum rebus ipsis) considerandum est de actibus voluntatis, qui sunt in comparatione ad ea, quæ sunt ad finem, & sunt tres, eligere, consentire, & vivi.* Vbi ab actibus voluntatis, qui circa finem versantur, non minus distinguit electionem, quam consensum, & vivum; qui omnium sententia sunt actus re ipsa ab intentione distincti. Nec verò Sanctus Thomas vspicam dixit, Intentionem & electionem esse unum re ipsa actum.

Secundo idem Sanctus Thomas quæstion. 8. articulo tertio, ita loquitur: [Respondeo dicendum, quod cum finis sit secundum se volitus, id autem quod est ad finem, in quantum huicmodi, non sit volitum nisi propter finem, manifestum est, quod voluntas potest ferri in finem, in quantum huicmodi, sine hoc, quod feratur in ea, quæ sunt ad finem: sed in ea quæ sunt ad finem, in quantum huicmodi, non potest ferri, nisi feratur in ipsum finem. Sic ergo voluntas in ipsum finem dupliciter fertur, uno modo absolute secundum se, alio modo sicut in rationem volendi ea, quæ sunt ad finem. Manifestum est ergo, quod vnu & idem motus voluntatis est, quo fertur in finem, secundum quod est ratio volendi ea, quæ sunt ad finem, & in ipsa, quæ sunt ad finem. Sed alias actus est, quo fertur in ipsum finem absolute, & quandoque præcedit tempore: sicut cum aliquis primo vult sanitatem, & postea deliberans quomodo possit sanari, vult conducere medicum, vt sanetur. Sic etiam & circa intellectum accedit; nam primo aliquis intelligit ipsa principia secundum se, postmodum autem intelligit ea in ipsis conclusionibus, secundum quod assentit conclusionibus propter principia.]

Ex quibus verbis habetur. 1. Voluntatem posse ferri in finem, etiam in quantum huicmodi, vt loquitur expresso Sanctus Thomas, sine hoc, quod feratur in ea, quæ sunt ad finem. 2. Hunc actum, quo fertur in ipsum finem absolute, quandoque tempore esse priorem electione mediorum. 3. Intentionem seu voluntatem illam efficacem finis, ad electionem habere se, sicut assensum principiorum præsum ad assensum conclusionis per principia; quos assensus constat esse diuersos. Quia omnia & singula probant, voluntatem efficacem finis etiam, qua finis est, iuxta Sanctum Thomam esse actum distinctum à subsequente electione mediorum; licet voluntas simul & per eundem actum feratur in finem, qua

ratione finis est ratio volendi media; sed diuersimodè; aut directè scilicet, in finem pér media; aut directè in media propter finem, quod non nogramus.

19 Tertiò idem Sanctus Thomas quest. 12. artic. 4. vbi querit, vtrum intentio finis sit idem actus cum voluntate eius, quod est ad finem, ita respondet: [Dicendum quod motus voluntatis in finem, & in id quod est ad finem, potest considerari dupliciter. Vno modo secundum quod voluntas in vtrumque fertur absolute & secundum se; & sic sunt simpliciter duo motus voluntatis in vtrumque. Alio modo potest considerari secundum quod voluntas fertur in id, quod est ad finem, propter finem: & sic vnu & idem subiecto motus voluntatis est tendere in finem, & in id, quod est ad finem. Cum enim dico, Volo medicinam propter sanitatem, non designo nisi vnum motum voluntatis. Cuius ratio est, quia finis ratio est volendi ea, quae sunt ad finem: idem autemactus cadit super obiectum, & super rationem obiecti: sicut eadem visio est coloris, & luminis: &c.]

20 Vbi rursus habetur, 1. finem secundum se, (etiam formaliter vt sic, ex dictis loc. præced.) appeti posse absque eo quod velimus media. 2. Illo quidem actu, quo volumus media propter finem, simul ferri voluntatem in finem & media, sed diuersimodè, in hæc seilicet vt obiectum directum Quod, in illum autem solum vt rationem volendi. 3. Finem habere se ad media, sicut lumen ad colorem; potest autem lumen conspici absque colore, et si vicissim color videri non possit, quin simul videatur lumen; sicut nec media formaliter qua media sunt, appeti possunt, nisi simul etiam feratur voluntas indirectè in finem, velut rationem volendi. Quod si viso colore necessario simul videtur lumen, etiam vt obiectum. Quod, cum tamen velimus media propter finem, absque eo, quod simul directè velimus finem, vt obiectum Quod, ratio diuersitatis est, quia sensus non est potentia ita abstracta, vt intellectus, ac proinde quando ratio motiva obiecti una cum obiecto simul etiam sensibilis est, velut obiectum Quod, fieri non potest, vt sensus elicit sensacionem quasi abstractam, qua solum feratur in obiectum illud vt Quod, nisi simul etiam feratur in rationem obiectuum vt Quod, quandoquidem, vt supponimus, vtrumque simul tanquam obiectum Quod potentia sufficienter proponitur: at vero voluntas, cum sequatur propositionem & abstractionem intellectus, quoad obiectum propositum, potest ferri in medium vt medium velut obiectum Quod, & in finem solum velut obiectum Quo & rationem volendi, vt accidit in illo actu, quando vult medium propter finem, iuxta Sanctum Thomam loco supra citato.

21 Quarto idem ibidem quest. 12. art. 4. ad 3. cum in arguento obiectum fuisset, non esse idem electionem & intentionem, Sanctus Thomas minime responderet intentionem & electionem esse idem, ut sane debuissest, si id verum esse existimasset, sed aliam responsonem adfert, quæ contrarium

non obscurè indicat. Ita enim ait: Ad tertium dicendum, quod motus qui est unus subiecto, potest ratione differre, secundum principium & finem: vt ascensio & descensio, sicut dicitur in 3. physice. (text. 21.) Sit igitur in quantum motus voluntatis fertur in id quod est ad finem, prout ordinatur ad finem, est electio: motus autem voluntatis, qui fertur in finem, secundum quod acquiritur per ea, quae sunt ad finem, vocatur intentio: cuius signum est, quod intentio finis esse potest, etiam nondum determinatus his, quae sunt ad finem, quorum est electio.

Vbi perspicue habemus 1. non omnem voluntatis motum erga finem esse intentionem, vt nec omnem motum voluntatis erga media esse electionem; sed vtrinque necessarium esse, illic quidem, vt finis qua finis, hæc vero vt media, qua media sunt, velut obiectum. Quod directè appetatur, prout superioris dictum est. 2. Intentionem finis etiam tempore priorem esse posse electione mediorum. 3. Intentionem & electionem habere se vt ascensionem & descensionem in motu, qui procul dubio à parte rei differunt; vt rectè Valquez, ethi Sanctus Thomas subiecto idem esse, & ratione differre dixerit, quia motus localis cum mobili realiter identificatur; & solum ab eo modaliter & ex natura rei, seu vt Sanctus Thomas loqui solet, ratione ratiocinata differt: quod ramen de actibus voluntatis sive inter se, sive cum subiecto comparentur, dici non potest, cum à subiecto strictè realiter differant, ex omnium sententia. Similis habet Sanctus Thomas ibidem question. 13. articulo 3. Ex quibus omnibus, mea quidem sententia, manifestè deducitur, intentionem & electionem, iuxta mentem Sancti Thomæ, propriè, & saltem moraliter loquendo, non esse eundem actu, sed realiter diuersum, vt proinde firma maneat superioris allata probatio assertionis. Plura de hac re tomo 2. disput. 2. quest. 3. dub. 4.

22 Quæ secundò etiam probatur, abstrahendo à nominibus Intentionis & Electionis. Quia actus ille, quo sanitas v. g. efficaciter appetitur, absque eo, quod vel de medijs quicquam omnino, aut saltem particulatum aliquid definitum est, est actus necessariò distinctus, & reali quadam subordinatione prior eo, quo particulatum feliguntur & appetuntur media; vt ex S. Thomaloco cit. constat sed efficax voluntas gloriæ tanquam finis beatorum, & voluntas particularis mediorum, adeoque meritorum in Deo æquivalent & respondent actibus illis creatis realiter distinctis: Ergo cum voluntas diuina virvute continens duos actus realiter distinctos ac inter se subordinatos, necessariò sit etiam ratione nostra distincta, & inter se subordinata; necessariò fatendum, etiam efficacem voluntatem gloriæ tanquam finis beatorum, in Deo, esse ratione distinctam à voluntate particuliari meritorum seu mediorum.

23 Tertiò. Si Deus vult merita propter gloriam; necessarium est, voluntatem meritorum esse ratione distinctam, & subordinatam volitioni, qua directè vult gloriam; cum feratur in obiecta plura cum quodam ordine, ita vt vnum velit.

velit propter aliud; sed verum est antecedens ex dictis supra disputat. 2. quæstion. 10. dub. 5. vbi docuimus, Deum propriè vnum obiectum velle, propter aliud; & rem illius Caietanum etiam asserentem, rectè dici, *hoc esse volitum à D E O*, quia illud est volitum; quod tamen ad præsens institutum non est necessarium dicere. Ex quibus proinde planè efficitur, voluntatem illam, qua Deus vult gloriam per mediageneratum spectata, ratione distinctam esse à voluntate directa seu electione meritorum: & utramque voluntatem habere quandam inter se ordinem prioritatis secundum rationem; quod proinde pariter etiam de prædestinatione ad gloriam, & meritorum seu medium dicendum est; & multo magis de prædestinatione ad gloriam, & præscientia absoluta meritorum: quandoquidem præscientia hac supponit prædestinationem meritorum, vt mox dicetur.

²⁵ Assertio II. Impossibile est, vt secundum rationem nostram, præscientia absoluta meritorum seu medium sit simul cum prædestinatione, seu electione ad gloriam: ac proinde etiam voluntas efficax, seu prædestinationis gloria & meritorum esset re & ratione simul; nihilominus tamen præscientia meritorum esset actus à voluntate illa, seu prædestinatione gloria & meritorum, ratione necessariò distinctus, eaque posterior. Ita sentiunt authores pro præcedenti assertione citati, & est proinde communis Doctorum, contra Nominales illos, aliosque nonnullos, qui eodem modo hac in re loquuntur de prædestinatione & præscientia meritorum seu medium; quasi hæc, non minus quam illa, simul ratione sit cum electione ad gloriam: quomodo etiam Gregorius de Valentia supra citatus docuit, præscientiam absolutam cooperationis perseverantis, esse quadam ratione simul cum decreto cuiuslibet effectus prædestinationis.

²⁶ Probatur assertio. Quia præscientia absoluta meritorum, est actus consequens & supponens futuritionem absolutam meritorum; præscientia enim absoluta non est causa rerum; neque res ideo futura sunt, quia Deus præsciuit esse futuras, sed ideo præscit futuras, quia futura sunt, vt dictum supra de scientia Dei disput. 2. quæst. 8. dub. 10. futurito autem absoluta meritorum consequitur & supponit voluntatem & prædestinationem meritorum, tanquam effectus causam, vt generatim dictum ibid. & dub. 4. quæst. 10. Ergo etiam ipsa præscientia meritorum secundum rationem subequitur & supponit voluntatem & prædestinationem meritorum: ac proinde etiam voluntas & prædestinationis meritorum esset simul ratione cum voluntate & prædestinatione gloria, nihilominus tamen præscientia meritorum necessariò erit voluntate & prædestinatione meritorum posterior. Consequientia patet. Quia quod est ratione posterius aliquo, est etiam ratione posterior eo quod cum illo altero ratione simul est; ea enim, que re & ratione absolute & simpliciter simul sunt, respectu nullius possunt habere ordinem prioritatis & posterioritatis. Gregorius autem de Valentia supponit ipsam præscientiam absolutam,

meritorum, seu scientiam visionis, esse causam obiecti præsciti, quod refutauimus cit. q. 8. dub. 10. vt inferius assert. 6. rursum dicetur.

Assertio III. Datur in Deo secundum rationem nostram distinctio & ordo prioritatis, etiam inter ipsos quodam actus diuinæ voluntatis, quibus homini efficaciter vult gloriam. Colligitur ex sancto Thoma quæst. 23. art. 4. vbi docet, Electionem ad gloriam supponere dilectionem: idem multò magis sentiunt omnes illi, qui docent, electionem ad gloriam esse ratione nostra priorem, electione meritorum, quos sequenti dubio referemus. Probatur ex notatione superius præmissa. Si enim datur in D E O voluntas efficax, & quasi prædestinationis gloria, per merita seu media conferenda; item voluntas efficax conferenda gloria ex præuisis, seu post præuisa merita, sed nondum recipia exhibita; vt etiam voluntas conferenda gloria, post merita ipsa actu exhibita, tum necesse est fateri, esse in D E O plures actus voluntatis ratione distinctos, ac inter se quodam ordine, prioritatis subordinatos, quibus D E O efficaciter homini vult gloriam: sed verum est antecedens, vt ostensum est: Ergo & consequens.

²⁷ Assertio IV. Necessariò admittenda est in actibus diuinæ mentis, quatenus efficaciter fertur in gloriam, & meritum electorum, duplex prioritas; una nimur secundum ordinem intentionis, altera secundum ordinem executionis: siue prædestinationis meritorum secundum ordinem intentionis simul sit, secundum rationem nostram, cum prædestinatione gloria, siue hæc sit prior illa. Ita sentiunt omnes illi, qui secundum ordinem intentionis electionem ad gloriam priorem faciunt prædestinatione & præscientia meritorum; quos suo loco referemus; speciatim Bellarminus libr. secundo de grat. & lib. arbitr. capit. 14. & Suarez hic libr. primo capit. 8. numero 50. & libr. 3. de auxil. capit. 18. numero 4. Idem etiam, nolint velint, necessariò sentire debent illi, qui secundum ordinem intentionis nullam prioritatem rationis agnoscent inter electionem seu prædestinationem ad gloriam, & inter prædestinationem seu præscientiam meritorum.

²⁸ Probatur assertio secundum authores prioris sententie. Si enim in D E O datur gratuita voluntas seu decretum conferendi gloriam per merita, secundum ordinem intentionis prior, prædestinatione & præuisione medium; & simul alia voluntas ratione distincta conferendi gloriam ob præuisa merita, ordine executionis posterior præuisione & prædestinatione medium; tunc necessario fatendum est, secundum hanc sententiam, in actibus diuinæ mentis, quatenus efficaciter fertur in gloriam & merita, esse duplum ordinem prioritatis, secundum ordinem intentionis nimur, & executionis; quandoquidem secundum eundem ordinem eadem voluntas gloria non potest absolute simul esse prior & posterior eiusdem respectu: sed verum est antecedens quoad posteriorem partem, ex dictis notatione initio præmissa: priorem

autem hi authores supponunt: Ergo & consequens in eadem sententia verum est.

30

Iuxta posteriorem autem sententiam probatur assertio hac ratione. Si enim præter actum diuinæ voluntatis, & quasi intentionem conferendi gloriam per merita, etiam iuxta hanc sententiam facendum est, dari insuper in DEO actum voluntatis distinctum, & ratione posteriore, quo nimisimum DEVS vult electis in ipsa executione conferre gloriam post merita tum præuisa, tum re ipsa exhibita, tunc necessarium erit secundum hanc sententiam admittendus est in DEO duplex ordo intentionis, & executionis, & duplex voluntas conferendi gloriam, una simul ordine intentionis cum ipsa prædestinatione meritorum, altera ordine executionis posterior prædestinatione meritorum: sed verum est antecedens: Ergo & consequens.

31

Maior propositio probatur. Quia voluntas illa conferendi gloriam per merita, item conferendi gloriam post præuisa merita, sed nondum exhibita, vel etiam post merita iam re ipsa exhibita, sunt actus in DEO ratione distincti, & inter se subordinati, ita ut posterior priorem supponat, eumque subsequatur, ex dictis in notatione præmissa: Ergo si primus ille actus simul ratione est cum prædestinatione meritorum, posterior necessariò prædestinationem meritorum subsequetur: & quia primus ille actus conferendi gloriam per merita, utique ad ordinem intentionis pertinet, imò est ipse quasi actus intentionis conferendi gloriam prædestinatis, posteriores vero ad executionem intentionis illius diuinæ iam præsuppositæ pertinent; quibus nimisimum exequendum decernitur, quod iam antea per actum illum diuinæ quasi intentionis constitutum est, necessariò dicendum est, posteriore actum esse ordine, executionis posteriore illo actu quasi intentionis, quem hæc sententia ordine intentionis simul esse dicit cum prædestinatione meritorum: præsertim quando codem ordine intentionis non potest voluntas efficax gloriae absolutè & simul, & posterior esse prædestinatione meritorum: sed si quidem simul, & posterior est, necesse est in diuerso ordine, intentionis, & executionis, simul, & posteriore esse, eadem prædestinatione meritorum.

32

Minor patet ex dictis in eadem notatione. Illic enim perspicue ostendimus, hos actus esse ratione distinctos, & habere inter se ordinem, quandam prioritatis, Deoque necessario in omnibus sententiis tribuendos.

Assertio V. Necessariò etiam proinde in Deo admittenda est duplex voluntas efficax conferendi gloriam; una gratuita per modum electionis ad gloriam; altera secundum debitum ex præuisis meritis: sive electio ad gloriam secundum ordinem intentionis prior sit prædestinatione meritorum, sive utraque simul sit secundum rationem nostram. Sequitur ex præcedenti assertione. Et quidem si Electio sit prior, secundum rationem prædestinatione meritorum,

patet assertio ex dictis assertion. præcedent. quia electio ad gloriam esto sit per merita, non tam est ex præuisis meritis, seu propter merita. Ergo est gratuita hoc sensu, quia gratis à Deo, & non propter merita præuisa concipitur; et si onerosa dici possit alio sensu, quia est voluntas conferendi gloriam sub onere: altera autem illa executiva voluntas simpliciter debita & onerosa est, quia est ex præuisis meritis, & non gratuita.

Idem dicendum, si Electio ad gloriam ponatur simul cum prædestinatione meritorum. Nam cum actus ille, conferendi gloriam per merita, nondum supponat merita futura, multò minus præuisa, cum sit causa meritorum, vt superius dictum, necesse est, ut hac sententia fateatur, voluntatem illam primam conferendi gloriam per merita, esse gratuitam, & non ex debito: cum tamen posterior illa voluntas conferendi gloriam ob præuisa merita, vel post præuisa, seu exhibita merita, non sit gratuita, sed debita, & ad Iustitiam utique pertineat. Plura de hac re inferius dub. 5. & supra disput. 2. quest. 10. dub. 5. assert. 9.

Assertio VI. Præscientia absoluta meritorum, seu cooperationis perseverantia, non fuit simul cum decreto cuiuslibet effectus prædestinationis, qua talis; cum plane sit posterior non solum decreto gratia congrua, sed etiam ipsa prædestinatione meritorum & cooperationis perseverantia. Hæc assertio est contra nouam quandam sententiam Gregorij de Valentia superius relatam, quam ex communi refellit etiam Vasquez 1. p. d. 92. numero 9. Probatur, primò, quia gratia congrua etiam secundum se & suam substantiam absolutè spectata, qua ratione est causa cooperationis, est effectus prædestinationis, iuxta Sanctum Paulum Rom. 9. Non est volens, neque currentis; & Augustinum in Enchiridio capite 32. & lib. de bono perseverant. capite 6. aliosque Doctores, qui etiam propterea dicunt, DEUS incepit prædestinationem in nobis, sine nobis liberè cooperantibus. Neque enim ut sic est effectus communis prouidentia; quandoquidem secum consequenter trahit cooperationem & perseverantiam finalē; & tamen ut sic est prior ipsa cooperatione, ut fateatur etiam Gregorius de Valentia. Imò vocatio congrua est initium prædestinationis passiuæ, seu primum donum gratia, à quo inchoatur in ipso prædestinato (supposito Esse naturali) prædestinationis executio, non quatenus actu cooperatur cum libero arbitrio, nec quatenus coniungitur perseverantia finali, sed prout præcedit omnem arbitrij assensum, vt bene etiam Vasquez loco citat. Ergo præscientia meritorum non fuit simul cum decreto gratia congrua.

Secundò, quia alias homo esset causa, aut saltem concusa totius prædestinationis, respetu omnium effectu ipsius, qua effectus prædestinationis sunt: est enim causa seu concusa cooperationis perseverantis, sine qua ista sententia nullum ait effectum prædestinationis perfici

qua-

qua talis, hoc est, qua prædestinationis effectus est.

Tertiò, quia præscientia absoluta D e i non est causa rerum, ex dictis supra disputat. 2. quæstion. 8. dub. 10. ac proinde nec præscientia meritorum est causa meritorum, ut supponit hæc sententia; sed potius uti præscientia absoluta cuiusvis effectus diuini, ratione posterior est ipsa prædefinitione seu decreto practico, ipsaque futuritione eiusdem effectus, ita etiam præscientia absoluta meritorum ratione posterior est prædestinatione & futuritione eorundem meritorum.

35 Ad fundamentum opposite sententia respondet primò, negando antecedens: si sensus sit, quemlibet effectum prædestinationis secundum se seorsum spectatum, qua præcise talis est, & abstrahendo à scientia D e i media, habere infallibilem respectum ad salutem aeternam ipsius prædestinati: certa enim liberatio & assecutio vita aeterna, qua in definitione prædestinationis ponitur, non est proprietas singulorum per se effectuum prædestinationis, etiam qua tales sunt, sed omnium simul donorum gratia, seu totius collectionis eorundem, prout inter se subordinantur. Quod etiam cernitur in partibus dominis, quæ dici potest structura habitationi hominum destinata, & idonea ad arcendas coeli iniurias; & quamvis singula partes domini sunt effectus, ad eum quem diximus, finem constructæ, non tamen ideo singulæ perse seorsim arcent cœliniurias, neque ideo etiam simul ab artifice intentæ sunt aut perfectæ, sed certo quodam inter se ordine.

Respondeo negando secundò, consequentiam. Quia etiam si singuli effectus prædestinationis habeant respectum infallibilem ad salutem aeternam prædestinati, adeoque ad ipsam, etiam perseverantiam prædestinati, certò & infallibiliter futuram, non tamen est consequens, singulos decretos esse, cum præscientia ipsius perseverantiae, tanquam ratione simul existente in mente diuina; quandoquidem ante præscientiam absolutam, quæ prædestinationem sequitur, respectum eiusmodi infallibilem habent ex ipsa scientia media, seu vt subsunt scientia Dei conditionata, quæ procul dubio prior est prædestinatione.

36 Restat nunc, vt eorum etiam argumenta soluamus, qui censem, nullum esse prioritatis ordinem inter electionem ad gloriam, & prædestinationem, aut etiam præscientiam meritorum: quanquam, vt deinceps patebit, nullum fere argumentum eod spectat, vt probet, ipsam etiam præscientiam meritorum simul ratione esse cum prædestinatione ad gloriam; cum tamen de hoc potissimum sit controversia, vt dignoscatur, an prædestination ad gloriam fuerit gratuita, an ex debito.

Primum ita nonnulli argumentantur: Omnis voluntas efficaxque finis intentio, licet obliquè & minus principaliter, necessariò tamen & essentialiter includit etiam media: atqui Scoti absolutum decretum dandi prædestinatis glo-

riam, ante præuisa merita, non potest dici alius diuinæ voluntatis actus, quam Intentio supernaturalis finis, vt plerique etiam sponte factentur, speciatim Suarez lib. 1. de prædestinat. capit. 7. & 8. & alibi passim: cogitari igitur & attribui D e o contemplatione nostra non potest, quin simul complectatur media illa, per quæ decernebatur idem finis consequendus, ea quæ non confusæ, siquidem talis cognitio diuinam maiestatem dedecet: Ergo fieri nulla ratione potuit, quod Scotus docet, vt Deus ab aeterno efficaci quadam decreto solam beatitudinem cuiquam prædestinatorum intenderet, non præuisis gratia meritis & medijs, per quæ in tempore foret obtainenda. Huius argumenti forma dicitur esse optima. Minor probatur auctoritate, experientia, seu inductione, & ratione duplia.

37 Respondeo negando maiorem, & consequentiam utramque. Major enim falsa est, si Sanctum Thomam audimus in 1. 2. quæst. 8. articulo tertio, vbi expresse ait: *Cum finis sit secundum se volitus, id autem quod est ad finem, in quantum huiusmodi, non sit volitus, nisi propter finem, manifestum est, quod voluntas potest ferri (nimurum efficaciter etiam.) in finem, in quantum huiusmodi, finis hoc, quod fertur in ea, quæ sunt ad finem: sed in ea quæ sunt ad finem, in quantum huiusmodi, non potest ferri nisi fertur in ipsum finem.* Et rursus quæstione 1. 2. articulo 4. ad 3. inquit Sanctus Thomas: *Intentio finis esse potest, etiam nondum determinatus his, quæ sunt ad finem, quorum est electio; vt etiam superius retulimus.* Falsum est igitur, efficacem voluntatem finis consequendi necessariò & essentialiter includere media, praesertim in particulari: quod proinde etiam de intentione finis dicendum: quia voluntas efficax finis seu boni per se expetibilis consequendi, non potest esse nisi Intentio. Quod sit ut finis etiam formaliter concipi possit, ablique hoc quod actu & explicitè referatur ad media, nimurum ita, vt sit bonum propter se expetibile, tamen si medium ut medium concipi non possit, nisi cum respectu ad finem, vt plane docet Sanctus Thomas cit. quæst. 8. art. 3.

Consequentia prima negatur; quatenus infert, D e v m in nullo instanti rationis cogitari posse, ullam habuisse voluntatem circa media, in obliquo spectata, quin simul in eodem rationis instanti distincte eadem voluerit: quasi alias confusa D e o cognitione tribuenda sit, qua diuinam maiestatem dedecet. Primo enim non est hic de cognitione sermo, sed de efficaci appetitione, & potuit Deus omnium mediorum distinctam cognitionem saltem simplicis intelligentiae (qua sola practica est) simul in eodem instanti aut potius ante illud rationis instans habere, sicut etiam re ipsa habuit; quamvis voluntas efficaciter in eodem instanti solum ferretur in media generatim; sicut etsi omnium mediorum possibilium simul distinctam cognitionem haberet Deus, potuit tamen aliqua solum, non omnia efficaciter velle: praesertim cum ipse met etiā Molina q. 23. a. 4 & 5. d. 1. memb. 8. in fine, distinguat in Deo duplice voluntate prædestinandi homines,

vnam generalem & needum determinatam ad certas personas; alteram particularem singulorum; quarum illa sit prior prædestinatione Christi, haec posterior. Etenim, inquit, *hæc Christi prædestinationis non antecedat voluntatem absolutam redimendi genus humanum per Christum, & per consequens prædestinationis in genere homines aliquos in Christo, antecedit tamen singulorum prædestinationem, qui ab ipso sunt redempti.* Secundò non ideo confusa Deo tribuitur cognitio, quamvis in uno instanti rationis secundum nostrum intelligendi modum solum assertatur habuisse cognitionem rerum aliquarum generalem, non particularem: quando præcisio hæc rationis non facit, quod minus interim Deus re ipsa simul eademque cognitione distinctè cognoverit omnia. Alioquin pari ratione dici posset, Deum in nullo instanti rationis habuisse cognitionem, quasi abstractuam rerum possibilium tantum, priusquam haberet scientiam intuitivam existentium: quod tamen est contra omnes Theologos, & apertam rationem, cum illa scientia sit necessaria in Deo, haec libera, ut suo loco dictum. Vide etiam de hac re infra dub. 7.

39

Consequientia secunda, à qua tamen omnes fere momentum pendet, manifestè falsa est; ideo, quia assumit nouum terminum, qui nec formaliter, nec virtualiter continetur in antecedenti, nimur intendere beatitudinem non præuisis meritis & medijs: quasi idem sic intendere beatitudinem non per merita, quicunque in antecedenti ponebatur; & intendere beatitudinem non præuisis meritis: cum tamen haec sint distinctissima; nec à negatione illius ad negationem huius, vlla sit consequentia: siquidem falsum est potest, Deum intendere beatitudinem non per merita & media, & nihilominus verissimum Deum intendere beatitudinem non præuisis meritis & medijs, nimur præscientia absoluta, de qua solum in praesenti loco est sermo: cum præscientia absoluta meritorum & mediorum subsequeratur prædestinationem corundem; & prædestinare per merita non significet merita esse causam seu rationem prædestinationis etiam ad gloriam; quod tamen significant verba illa, prædestinare ex meritis, ut dictum supra assert. 2.

40

Secundo objicitur. Finis formaliter appeti non potest, nisi per idonea media; sicut nec media, nisi cum ordine ad suum finem: Ergo cogitari ab humana ratione nec debet, nec vere potest, primum aliquid instans ac signum, quo Deus electus suis solum gloriam intenderit, neque secundum quod sola media gratia ac bonorum operum.

Respondeo diuersam esse rationem finis & mediorum: finis enim formaliter aliquo modo (prout scilicet absolute etiam concipi potest) expeti potest absque vlla expressa & actuali cogitatione & volitione mediorum etiam in genere; at vero media non item, nisi simul obliquè etiam appetatur finis, ut ex S. Thoma in I. 2. quest. 8. art. 3. in solutione argumenti præcedentis diximus. Neque Scotus, vel alius Theologorum illus, in secundo instanti ita à Deo expeti docuit media, quin simul in obliquo expectatur etiam finis; sed hoc dicunt, in primo instanti directè solum finem, in

secundo directè sola media expeti, ut superius exposuimus.

Tertio objicitur. Quamvis in humanis actibus aliis sit Intentionis, quam Executionis ordo, quo nimur prius intenditur finis, quam elegantur media, electaque executioni mandentur, talis tamen ordo & progressio humanæ cognitionis imperfectione nititur: Ergo in Deo locum non habet.

Respondeo ad consequentiam, non habere locum prout imperfectionem inuoluit, imperfectæ cognitionis, itemque realis pluralitatis & successionis actuū, qualis in Deo nulla est: sed non sequitur, secundum rationem nostram non posse, per comparationem ad actus humanos, pluralitatem eiusmodi quandam & ordinem actuū in Deo constitui. Alias enim in Deo omnis plane secundum rationem pluralitas actuū & subordinationis esset è medio tollenda; cum non nisi per respectum ad actus creatoris, prout supposita subiecti creati imperfectione, realiter multiplicantur & subordinantur, distinguantur, ut supra dictum, & fatus disp. 2. q. 10. dub. 4.

Quarto objicitur. Et si quidem homines, pro intellectus sui imbecillitate & ignorantia, plerique solent peculiares quodam actu finis intendere, ac postea ad distinctam specialemque medium inquisitionem, cognitionem, & vnius pra alij electionem, deliberando progredi, tamen si eam cognitionem vel ante, vel simul ac finem coepimus intendere, habere possemus, ut Deus, & Angeli, tum prætermissa deliberationis labore, plurimumque actuū exercitio & discursum, uno primoque statim actu finem cum medijs sati distinetè cognitis appeteremus. Ergo cum in Deo, in quolibet rationis instanti sit perfectissima & distinctissima cognitionis (ad simplicem intelligentiam spectans) omnium medium, fatidū est, eum unico primoque statim actu finem cum medijs appetere, sine vlla nimur pluralitate & subordinatione actuū intentionis & electionis, etiam secundum rationem nostram.

Respondeo negando consequentiam, ob duas causas: Primum, quia procedit ex hypothesi falsa & impossibili, ex qua non nimur, si sequatur falsum. Certe si alia esset ratio & ordo operandi in humanis, quam modo est, aliter etiam in Deo rationem & ordinem actuū secundum rationem nostram constitueremus: at vero respiciendo, ut par est, ad eum modum & ordinem operandi, quem in nobis re ipsa cernimus, utcunq; ex imperfectione nostra proueniens, merito estiam eum, quem diximus, ordinem, non quidem re ipsa (quod imperfectionis esset) sed secundum modum tantum nostrum intelligendi, Deo, omni imperfectione seclusa, tribuimus.

Secundò. Etiam posito antecedenti, tamen non sequetur, ideo in homine non fore ipsa distinctos proprios & formales actus Intentionis & electionis, sed ex hypothesi illa hoc solum sequetur, fore ut homo simul & vnico re ipsa actu intendat finem per media, etiam particulariter cognitam; qui tamen est actus propriè directè & expressè solius intentionis, non electionis: quod quo-

doquidem eo actu solum finis directe, media autem solum oblique appetuntur. Quare actus ille non obstat, quo minus etiam homo habere posset alium actum realiter distinctum, & saltem ordine natura, si non temporis posteriorem, quo directe appeteret media proper finem; qui est actus electionis. Multo minus igitur concludi potest, in Deo non posse secundum rationem distinguere intentionem quasi beatitudinis, & electionem mediiorum, & hanc illi aliquo modo subordinari, quia ad hanc distinctionem rationis sufficeret realis distinctio similium actuum in homine, cum subordinatione eorum inter se ex natura rei: præsertim quando Deo utraque voluntas efficax & finis, & mediiorum modo perfectissimo tribuenda est.

44 Quinto obicitur. Electio gratuita ad gloriam, quem constituant illi, qui eam ratione priorem faciunt præscientiam meritorum, contradictrice opponitur electioni ex præuisis meritis, quem statuant tum alij Theologi, tum illi, qui ratione simul dicunt esse prædestinationem gloriae & meritorum præscientiam: Ergo non potest simul constitui Electio gratuita ad gloriam, & aliquid decretum diuinum ratione posteriorius, (ad ordinem executionis pertinens) quo Deus decreuerit conferre gloriam ex præuisis meritis, vt docuimus assertione 4. &c.

Respondeo negando consequentiam. Quia decretum illud, quo Deus decernit gloriam ex præuisis meritis, cum sit posterior electione ad gloriam, atque ad ordinem executionis, non intentionis pertineat, propriè & strictè loquendo non est electio ad gloriam, sed executiū decretum conferendi gloriam ijs, qui iam antea priori decreto sunt electi. Electio enim ad gloriam propriè dicit segregationem saluandorum ab ijs, qui saluandi non sunt, que segregatio propriè non sit decreto illo executiū, sed supponitur. Quare esto, electio ex præuisis meritis, & electio gratuita, propriè & strictè loquendo, sibi contradictrice opponantur, certè tamen qui statuant electionem ad gloriam ante præuisis merita, non statuant aliam electionem ex præuisis meritis, vt obiectio supponit, quem oppositæ sententiae authores constituunt.

45 Quod si dicas, Electio ad gloriam gratuita, contradictrice opponitur cuilibet decreto conferendi gloriam, ex præuisis meritis, etiam executiū; sicut conferre alicui gloriam gratis, & non gratis, contradictrice opponuntur. Ergo hæc duo decreta non possunt simul stare in Deo. Respondeo falsum esse antecedens. Quia electio dicitur gratuita, non quod per eam Deus statuat conferre gloriam gratis, sed quia Deus gratis, hoc est, absque prouisione meritorum, statuit conferre gloriam, quounque demum medio interueniente sit conferenda, ita ut vocabulum *gratis* denominet & appellat verbum statuit, non autem verbum conferre. Quo sit, ut eiusmodi electio gratuita minimè pugnet cum decreto conferendi gloriam non gratis, sed ex præuisis meritis: sicut etiam cum eo non pugnat ipsa actualis collatio gloria ex præuisis meritis.

Et vero posse primam ordinationem seu intentionem conferendi aliquibus præmium esse gratuitam, cum tamen actualis collatio præmij, seu decretum ipsum executiū conferens præmium non sit gratuitum, patet quotidiano exemplo Regis, qui liberali solum & gratuita benignitate, adeoque gratis destinat & proponit præmia certantibus & vincentibus, cum tamen postea ea in executione gratis non confert, ita etiam decretum ipsum executiū, quo præmium re ipsa confertur, non sit gratuitum, sed ex præuisis meritis. Quod miror tandem ab authoribus quibusdam contraria sententia non animaduerti.

Dices. Hoc ipso, quod Rex ille decrevit præmia nonnisi decertantibus & vincentibus, non decrevit præmium vllis conferre, nisi mediante certamine & victoria obtinendum: Ergo non fuit gratuita illa ordinatio. Respondeo negando consequentiam: quia certamen illud & victoria non erat medium ad ordinationem illam faciendam, quæ solum gratuita, vt dictum, benevolentia Principis facta est, sed solum est medium ad conferendum re ipsa præmium. Quare etiam hac admodum distincta sunt, velle conferre gloriam per merita, & velle conferre gloriam ex præuisis meritis: prior enim voluntas potest esse gratuita, posterior non item.

Omitto quod in Antecedente quinti huius argumentum supponitur, simul esse præscientiam meritorum & prædestinationem gloriae, & nihilominus prædestinationem ad gloriam esse ex præuisis meritis; quæ tamen duo manifeste implicare contradictionem supra assertione secunda & quinta ostendimus; neque vero idem est præscientia meritorum, aut prædestination gloriae ex præuisis meritis, cum prædestinatione meritorum, aut cum prædestinatione gloriae per merita, vt sepius dictum.

47 Sexto obicitur. Tuxta veteres Patres & Theologos, prædestination tota in mente diuina ita peracta & plane consummata est, quod nimis Deus, supposita tam scientia absoluta omnium rerum possibilium, quam conditionata futurorum contingentium, statuit cum unoquoque saluando, omnium mediiorum seriem exequi, quibusdam certo & infallibili, si talia ipsi salutis media conferret, prænouit, æternæ beatitudinis gloriam consecuturum: Ergo secundum, rationem nostram nec prius gloriam, quam gratia merita, nec vicissim gloriam ante gloriam, sed utraque simul decrevit.

Respondeo primum: Utinam Antecedens ex veteribus Patribus & Theologis ab obiectante tam probatum redderetur, quam confidenter eis tribuitur; equidem nos eum prædestinationis modum, mediante scientia media peractum, libentissime amplectimur, & defendimus disput. 2. quest. 10. dub. 5. vbi de scientia media egimus, sano tamen modo intellectum. Primum, vt Deus in unoquoque saluando non omnium plane mediiorum seriem delegisse dicatur, quibuscum eum, si darentur, gloriam consecuturum prævidit, vidit enim in unoquoque prædestinato adhuc

infinita alia media possibilia, quibuscum, si darentur, saluatum iri prævidit, neque hoc modo loquuntur Theologi; sed ut ea certe media, quibuscum vnumquemque saluatum iri præviderat, delegerit. Secundo ut prædestinationis tota formaliter non censeatur peracta sola illa selectione mediorum, quia negari non potest, prædestinationem simul etiam formaliter includere directam & expressam voluntatem gloriae, seu electionem ad gloriam, ut dictum quæst. 2. dub. 1. sed interveniente tamen conscientia media, selectioneque illorum mediorum, qua diximus, consummatam fuisse prædestinationem, omnino concedimus.

Quo posito, respondetur secundo, negando consequentiam; quia cum prædestinatione diuina non complectatur solum ordinationem illorum mediorum, sed directam etiam & expressam voluntatem gloriae, qua quidem etiam voluntatem illam effacem mediorum ratione antecessit, vel dubio sequenti dicetur, negari nullo modo debet, diuinam prædestinationem, secundum rationem nostram, complecti plures actus diuinæ mentis, eosque ordine quodam prioritatis inter se subordinatos, ut dictum. Quod ipsum tamen etiam pariter dicendum est, tametsi prædestinatione solam mediorum voluntatem complectetur, quia nihilominus ipsa media, prout proprius aut remotius fini coniuncta sunt, quandam inter se ordinem habent, ob quam pluralitatem & subordinationem, etiam pluribus actibus ratione nostra & quodam ordine eligi à Deo dicendum fore, ut inferius suo loco magis patebit quæst. 5. dub. 6.

DVBIVM III.

*Virum in diuina mente Electio seu
prædestinatione ad gloriam, ratio-
ne prior sit, tam prædestinatione,
quam præscientia meritorum,
seu mediorum, vel contra: spe-
ciatim quid hac de re tum ceteri
Doctores, tum præcipue S. Au-
gustinus, & S. Thomas senserint.*

S. Thomas 1. p. q. 23. a. 4. 5. & 7.

Constituto iam ante præcedenti dubitatio-
ne hoc principio, esse secundum rationem nostram in diuina mente ordinem aliquem prioritatis inter Electionem seu prædestinationem ad gloriam, & inter prædestinationem, multoque magis præscientiam meritorum seu mediorum, restat ut ordinem hunc particulatim ac distinctè explicemus; quod sequenti demum dubitatione faciemus, postquam hoc dubio varias hac de re Doctorum sententias, ac præsertim quænam fuerit hac de re S. Augustini, & S. Thomæ sententia exposuerimus.

Sicut igitur hac de re vniuersim tres Docto-

rum sententia. Prima vniuersim docet, voluntatem efficacem, seu prædestinationem atque etiam præscientiam meritorum, seu mediorum, seu quod eodem spectat perseverantiae finalis, ratione priorem esse electione seu prædestinatione ad gloriam. Hanc sententiam ex instituto prolixè sequitur & defendit Vasquez 1. p. tom. 1. disputat. 89. cap. 2. & seqq. & quanquam eodem capite 2. à numero 10. ex instituto eam auctoritate Doctorum confirmare nitatur (in qua re etiam ipse alias solet esse diligens & accuratus) plures tamen pro ea non citat ex ijs, qui sua scripta in lucem dederunt, quam Bartholomaeum Camerarium in dialog. cap. 5. Osorium lib. 9. de Iustitia, Turrianum opusculo de electione, & Guilelmum de Rubione in 1. d. 41. quæst. 1. art. 1. & 2. conclus. 3. quibus addit Argentinam in 1. d. 41. quæst. 1. art. 2. Pighium lib. 8. de lib. arb. cap. 2. Stapletonum in cap. 9. Rom. & orat. sing. Addit Vasquez: Idē sensisse videtur Maior in 1. d. 40. q. 2. sed quem inferius aperte pro opposita sententia adducemus. His ex parte idem Vasquez subiungit Ockamum & Gabrielem; sed quos ipsi nemotat non esse huius prime sententiaz, sed eius quam secundo loco refutemus.

His à nonnullis adduntur Albertus, & Henricus Gandauensis: sed quos merito prætermisit. Vasquez; cum potius oppositum sentiant, ut bene etiam notauit Henriquez lib. vlt. c. 11. §. 3. lit. O. Eandem sententiam sequuntur Gregorius de Valencia q. 2. 3. punct. 4. §. 3. 4. 5. 6. aliquę nonnulli recentiores: è quibus non nemo, solam B. Virginem excipiens, quoad ceteros, hanc etiam confirmam edito libro vulgatam addidit his verbis: *opposita sententia mibi semper visus est a veritate, & doctrina sacre scripture, & SS. Patrum aliena; nec pietati & moribus suis consona, &c.*

Solent etiam à nonnullis pro hac sententia adduci ex antiquis Scholasticis omnes illi, qui falsò quidem & improbabiliter senserunt, dari ex parte prædestinationis causam siue totius prædestinationis, siue prædefinitionis ad primam gratiam, saltem ex parte effectus; quos superius quæst. præced. dub. 4. retulimus, & quos solos etiam resert Eckius in Chrysopasso centur. 3. n. 29. Sed qui tamen ad præsens institutum vniuersim non spectant; quia etsi quidem illi docuerint, ex parte prædestinationis dari causam primæ gratiæ, seu etiam prædefinitionis ad primam gratiam congruam, ex parte effectus; simili tamen plerique aperte negarunt, dari causam seu rationem ipsius per se, prædefinitionis, vt ibidem retulimus, & speciam videre est in Alesio, Bonaventura, Gandauensi; & notauit ipsem Vasquez cit. disp. 91. c. 10. n. 65; adeo ut exillis, præter Argentinam, & eos, quos iam ante retulimus, vix alios inuenias.

Tametsi vero authores superius citati præcipue de adultis loquuntur, tamen seruata proportione idem de parvulis sentiunt; nimis eos ad gloriam prædestinatos non esse, nisi post præuisionem applicationis salutaris eorum mediorum, quibuscum gratiam ad finem usque perseverantem erant consecuturi. Quocirca etiam Vasquez disp. 90. cap. 2. omnium prædestinationum

eandem